



9. November 2023

UKA2023/138

Imigassat aalakoornartortallit kimittuut sumiiffiit ilaanni matoqqatinneqarnerat pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq Knud Mathiasen, Attaviitsoq)

Apeqquteqaat aallaavigalugu oqallisissiamik siunnersuuteqartoq Siumumiit qutsavigaarput.

Siullermik oqaatigissavara kommunit minnerunngitsumik innuttaasullu kiffaanngissusaat uani qitiummat. Kiffaanngissuseq inummiilli, qulaaniillu aalajangertarnerit akuersaaruminaattaqaat.

Taamaakkaluartoq immitsinnut aperisariaqalerpugut, nunatsinni imigassamut inatsiserput ilumut inooriaasitsinnut tulluartaunersoq, ilumut inuiaqatigiinnut atoruminartuunersoq? Nunanut allanut sanilliullugu inatsiserput sakkukinneralaarsuuvoq. Aamma ullumikkut piffiit ilaannut immaqa peqqussutit tulluarunnaarsimapput? Apeqquterpassuit akiuminaatsut qaffakaapput.

Inuup ullormut imertagai killilersunngikkaluarlugit imigassamik inatsimmik sukaterisoqakuttoorsinnaavoq, tamannali ajoraluartumik innuttaasunit amerlasuunit paattoorneqartartoq.

Imigassaq aalakoornartortalik kimittuooq piffinni matoqqatitsiffiusuni, pisartut oqaluttuassartai qiviaranni imaannaangillat. Annernangaartunik pisoqartarpoq, kisitsisit saqqummiunneqartartut salluneq ajormata, Imminut toquttarnerujussuaq, Inuartarnerit, Meeqqanut kinguaassiutitigut kanngutsaatsuliornerit akulikitsumik pisarlutik. Ima qaffasitsigipput inuiaqatigiinni annertuumik nanertuutaasimallutik. Sulilu pissutsit taamaattut atuullutik. Tamanna kialluunniit akuerisinnaangilaa. Aalakoornartoq kimittuooq aqussinnaangisatsinnik silaarutsitsisarpoq ilaatigut niaqulaartunngortitsisarpoq. Kialluunniit aqussinnaangilaa, atuinermi killissaq inummi namminermiippoq. Oqarsinnaanginnatta qanoq annikitsigisumik pigaanni killissaa aqunneqarsinnaasoq. Taamaattumiguna oqartugut kiffaanngissuseq inummiilli.

Oqaatiginngitsoorusunngilarali, Ilorlikkut atukkat imaannaasanngillat, oqaluttuarfissaqannginneq tatigisaarunneq killikkaanni aalakooraanni anniaat tammartuusisarnera qimaavigineqakkajuttarpoq. Tassunga killissimasunut oqarusuppunga, Paasisinnaalluarpatsigit ikiortariaqarassi.



Ilaatigut oqartoqartarpoq nunasiaataasimanerup kingunerisaanik, qaavatigullu kommunet ilaasa inuiaqatigiit annertuumik kiffaanngissutsimik tusaanngitsuusaarpaat.

Suliffissaqannginneq Inissaaleqineq annertuumik atornerluinermut kingunerlutsitsisarpoq. Taamaattuminguna qulaaniit aallajangigassarput taannaagaluarpoq, suliffissanik nutaanik pilersitsiortoqassasoq, sanaartortoqassasoq inissaaleqinerup akiorniarneqassappat.

Matusisimanermut tunngaviusimavoq, politiit nalunaarutaat, isumaginninnikkut nalunaarutit, peqqinnissaqarfiullu nalunaarutai imaannaanngimmata. Ukiualuit maannamut qaangiussimalerput, soqutiginarpoq eqqartussallugu paasissallugulu ullumikkumita pissutsit qanoq inissisimappat, ilumut inuiaqatigiit kissaatigaat ammaasseqqittoqassanersoq.

Taannalu apeqqt sumiiffimmi innuttaasut siulliullutik kingulliullutillu aalajangersaaffigissagaat Siumut isumaqarpoq.

Taamak oqaaseqarluta oqaluuserisassanngortitsisoq qutsavigaarput.

Lars Poulsen
Siumut